

玉
塵
新
譚

洛如花

無友不如古

婁逞

疫無忌

吹笛雨止

齒本

太甲罄

誕十四月

卷之三

譚笑却虜

半隱園

長恩

讀書匡山

陸羽著書甚多

韓幹

古度林於

文信國

渡江佩禹字

崑崙玉璫

王瑞安

臥疾猶時作詩

多情花鳥

蒲坂

栢倒栽

生而能言

盜亦有公是非

落英

芝麻通鑑

終身不淺土

雅謔

玉脂燈臺

易腸鼠

桓

蓄墨數百觔

胡光祿

武侯父子

驚湖松

碧葬

如客得歸

一生宦途掌兵

廣道

明詩評

卷之四

周翁

鄧文潔

太白書迹

楊君非所及

如意盤

書倉

文星典吏

顛主事

文選槩入詩賦

里中祥瑞

葡萄說

賭書

名聞夷夏

秦結了

秦渠

彩雲見南中

簡遠有準

楊廷和

忠賢奇秘錄

齒耳

丐貸營葬

癡道人

步輿

赤刀役虎

鳴過鐘

奇禽就掌取食

吉祥指揮

荔枝

酒沃瓜

鄂家鳴金

掘土得蘭亭

夏太常

慧明

雙手寫二牘

廣陵困道

第四泉

樹中鼓樂細人

不能蓄書

仰廷尉

良知

卷之五

帝鴻氏之硯

紫玉盈坐

張九成

二程同赴一席

東湖樵夫

玉雞苗

武城

藏書富倚軒

張宜人

紙目致明

金雞

劉道人

詣掾長揖

雲齊

以字行

駙馬提學

蝨念阿房宮賦

右軍帖

暗誦九經

辭賻

長春樹

鰲腹中有老人

少陵舊居

張仲清

秣馬

設肆鬻字

桂侍御

筆仙

赤虹化黃玉

王郡尊

海鹽墜龍

見博山鹽頻頗

甘少府

神交濟南

鹽沐用七人

叱水減

鮑照

素負節槩

卷之六

御史河

花歎

夢日入懷

陳太丘碑下氣

喻村

穆王書史

曹聖君

風賦

取灰撒羹

夢栽錦

僧家大言不慚

說鬼

天台丈人

載泉水

古鏡

純任直法

紙錠化真金

鼎折足

詞女之夫

春草

歐家童

聞報鼯寢

杜門

銅唾壺

龍井化酒

屏騎從問民間

白鵠

我朝宦官

五色土

徙癰

山東異事

偏髡子

遠志

青蠅拜賀

鍾十二峰之秀

知禽語

費君不死

愁破

西巖寺

特謁壽星

體縮

卷之七

劉大將軍

玉整花

竈有三十六神

第三天子

大靈豆

艾

野馬

碧芳酒

水晶不落

五天

申屠蟠

片紙決疑獄

終身不配

一滴泉

扶老

夜歸憑咒

山天志

山帶

夢肩抵石

鐘自鳴

視皮

噓氣成雪

蛙化鶉

巨棺

自見其耳

右軍書法大進

無夷

食中蠅

無貳爾心

尺牘

李西平

動心寂寞

械虎

安庭栢

丘濬愧其夫人

牢丸

大小歐陽

秘景符

玄鹿

卷之八

瑞雉

瑞英簾

兔目鼠耳

三秦豪傑有幾

昔昔鹽

公差迷路

鳥獸

夢得瓜

小樣驪山

閨秀

石判官

高麗進士

訛言閏十二月

屠儀部

輓玉

某星有異

臨清狐

腹寶

狐穴詩人

三歲受孝經

視師疾

劍俠之流

山獐

驢生卵

命在斗牛

乏薪燃紅紙

緯好鬚

四門博士

井鳴

閉門羹

賣藥王老

萍

薛度弘

浩浩白水

燕公記事珠

鳩杖

五世吏部

黃河清

偶記目錄

偶記卷之一

信州鄭仲夔龍如撰

南昌朱謀埴鬱儀閱

立言莫能增損

吾輩立言須令後人莫能增損不爾便當棄去
異時聲名盛著敝帚千金雖自欲刪削弗可得
已杜工部人稱詩聖而集中俚句竝傳至今其
他作者亦槩乎未睹全美良以是故吾上下千

百年獨于濟南無間然也

坐客恒滿

徐子與十歲能文眉目如畫所周旋皆賢豪長者既交李于鱗王元美取舊作悉焚之罷官家居坐客恒滿

鷓鴣米

弋陽汪少宰偉嘗赴一中官請酒竣設飯不遇半甕而香滑有膏異於他米汪問所從出荅云

蜀中以歲例進者其米生於鵲尾每尾只二粒取出放去來歲仍可取也汪大奇之

玄祿

老子始生其母命之曰玄祿

夢舜投鐘

韓大司馬邦奇精樂理楊仲芳從之受樂三月得其數韓令備十二律之管管各備五音七聲而成一調公退而凝思廢食寢者三日夢大舜

投以金鐘使擊謂曰此黃鐘也公醒而汗恍若
悟者起篝燈複製管至明而成者六已而十二
管成韓公拊膺曰得之矣始吾輯樂志成而九
鶴飛舞于庭其應乃在子耶

仁和令

周宗建爲仁和令多異政縣有人家娶婦兩姓
俱宦族奩資甚厚一儉賊混入其室遂匿床下
衆不知也惟新人見之而不敢言比婿入將寢

婦始曰床下尚有人未出婿大驚令家人搜出賊乃詭云女約我來夜半持奩資同奔何負心至此婿疑其真遂欲出婦訟之令令責偷賊曰安有是事命監之越數日取一妓至縣如新人狀復取賊出詰曰渠旣與女同謀往熟識乎賊叩首曰安有不識之理令指妓問賊賊曰是也令卽以賊抵罪婿與婦復得合一縣稱快

先施

西字古叶先用曹子建美女篇美人妖且閑采
桑岐路西柔條紛冉冉葉落何翩翩今本易西
作間者誤西施或作先施

十二時盤

唐內庫有一盤色正黃圓三尺四周有物象逐
時變更如辰時花艸間皆戲龍轉巳則爲蛇轉
午則成馬因號十二時盤元和中偶用之

天親竹

天親竹一根兩岐當春每發雙筍又衡州人家
有筍徹梢無節目名通天筍又有一種野竹其
葉糾結如蟲狀鄉人呼爲蚱蜢竹

徵刻清言疏

寅卯間余清言告成貧無鋏資遂久陳筍中余
友費文孫慨然疏告同人共襄此舉丙辰秋得
付殺青今工用竣而文兄杳然逝矣再簡疏稿
真覺一字一酸悽也并錄之以識不忘疏曰蓋

聞法言就而千金乞版上之空名論衡成而一日作帳中之鴻秘斯奇文之共賞要至言之必傳余友龍如者蚤歲登壇已窺二酉髫年搦管便賦三都兼孔室之四科擅鄭門之六藝繡帙縹囊夜月閉孫生之戶牙籤錦軸春風拂董氏之帷莫不博覽天下之書旁通古今之學監斯精義著彼清言弄墨晨披寧辭寒暑燃脂瞑寫載歷周星排沙揀金標新領異假令真長坐對

故應墮其霧中就使道林復生不覺入其玄裏
三復絕倒一徃解頤貽諸好事庶無尚白之譏
副在名山徒有殺青之志願弘茲舉實藉同心
惠然肯來永以爲好文孫名雲仍鉛山人

石號

四川南江縣自建邑來無鄉舉者或以前山巨
石爲祟令鑿去之鳩工殫日石幾墜其夜石號
曰邑今固無佳士遲二十年有可當賢書其人

我方自去人力其若我何詰朝視之復如故遂
罷工至萬曆壬午邑諸生岳虞詢始舉鄉薦前
一夕石復語曰今有人我須去矣翼日石自隕
山下果捷音至後虞詢登壬辰進士

博物志

張茂先讀書三十車造博物志四百卷奏於武
帝帝以爲繁令芟截浮疑分爲十卷卽于御前
賜于圖青鐵硯遼西國麟角筆南越側理紙萬

番

騷壇倚頓

比部曹遠生先生名徵庸爲人冲澹落穆翩然
塵氛之外孫明府嘗目之曰通敏寥廓騷壇倚
頓或云中通外朗溫其如玉

堯舜其猶病諸

王季和問舒元直曾論云堯舜其猶病諸爲真
病假病舒還荅曰世尊普度衆生普度否季和

偶記

卷之一

六

撫掌大笑舒名曰敬南昌人王名宇春常熟人

孫登琴

孫登琴遇雨必有響如刃物聲竟因陰雨破作
數截有黑蛟踊去

長穀

柳州有人掘地種竹忽地中鏗然有聲得一石
甕發之有穀數百枚長三寸餘去膚熟之香美
異常後食者壽皆二百三十歲飲其汁者壽亦

八九十

復建文年號

萬曆乙未 上復建文年號允禮科給事中楊
天民四川道御史牛應弘請也又 上御極初
允閣臣議優卹建文諸死節臣許各地方或特
爲建祠或祀諸鄉賢有司春秋祭祀

以茲爲年

古詩爲樂當及時何能待來茲茲新生草也草

十年一生故古人以茲爲年

舜造筆

筆不始于蒙恬張華博物志舜造筆

南屏

南屏山爲郡名勝余結小齋其下扁曰南屏山房始與文孫諸君講德處也武林亦有南屏旁有寺曰淨慈余初至湖上寓此與徐楚白定交處也

黃芝鐵獺

李白有馬名黃芝梅聖俞有馬名鐵獺

韓太史

世稱韓求仲太史肝腸如雪意氣如雲韓名敬
歸安人少爲馮開之所歎

袁氏

會稽袁氏自齊梁歷宋嘉泰凡七百餘年無異
爨子弟或士或農大中祥符四年越州守奏旌

其間時已十九世矣闔門三百口其族長曰承詢至嘉泰初又五六世聚族亦加于昔

女中烈丈夫

海寧虞氏董湄妻也少慧知書善吟咏年十六歸董甫兩月而湄卒痛絕欲死以殉家人守之遂不得死父母惜其年少勸女再嫁女不應乃刻木爲夫像晨昏禮事年五十餘而卒人謂女中烈丈夫云其咏菊詩曰移得春苗愛護周柴

桑無主爲誰收寒芳其抱枯枝萎羞墜西風逐
水流婉烈可誦蓋自寓也

徐司馬

徐晞以椽歷官大司馬同列多輕之值稗菜衆
指宣聖像戲曰君解渠爲何人徐應聲曰是不
繇科目顯者

遺韻

亡友汪恭仲櫟貴溪人天才俊逸壬子罷省試

歸始學爲韻語便爾超然有白眼千秋思青山
兩地愁深語芙蓉泣狂歌蟋蟀驚之句寘之盛
唐人集中幾不能辨也余偶憶其遺韻不覺潛
然特拈出之

地過日月

傳稱神農氏地過日月之表

沈君典

沈君典嘗爲讐所魔三納之甕而甕三破

倡導師之議

王奕爲宋遺臣宋亡奕以天下無君倡導師之議帥江以南人士三載一覲闕里奕玉山人

黃太常墓

萬曆初年詔褒錄建文諸死事者黃太常子澄墓始出一時稱快於是特爲建祠墓發於雷有誌銘剝蝕若追蠡而一字不侵泯銘後數語若識皆隱建祠時諸人姓名不遺一人公雖族然

黃有後一子走楚爲田經後有叅議表者復黃
姓一子走吳爲彥修其後有博士雲以文學顯

卜隱

邢量字用理獨居不娶殫瘁甚以卜自隱每日
作一二卦卽閉肆不復與人接敗屋風雨不蔽
苔生坐隅破絮自擁突嘗不煙其庭可以搏鼠
而猶嘯歆自若也於學無不通壁下盡列圖史
枕籍其間客每就譚不爲具脫粟青菹饑則往

他所食復來與共徵逸事雖疏者已窮而猶列所未盡

今木蘭

韓氏保寧民家女也明玉珍亂蜀女恐爲所掠乃易男子飾托名從軍調征雲南往返七年人無知者雖同伍亦莫覺也後遇其叔携歸依然貞女時目爲今木蘭云

清狂自晦

王仲光賓初名國賓長洲人有異才於經史子
籍天官樂書兵家稗志靡所不該覽尤精於醫
不樂仕進乃自晦爲清狂貌故寢又以藥黥面
及肘股間墜髮短服行歌道傍故舊有訪之者
輒箕踞捫蝨不相酬對以益自廢郡守姚公知
之微服再三往候乃稍稍露其奇姚大嘆賞爲
具賓主成禮而去越人戴原禮國初名醫也來
吳賓叩其秘傳原禮不肯授欲使折節賓不可

因瞰其亡直往取書去乃益善爲方所治無不
全賓奉母篤孝年七十病華母呼之絕而復蘇
已又聞其聲若在左右猶稱兒不忍舍母者良
久乃滅所著有光菴集吳中名賢記

壽歲

周穆王壽百三十四歲召公奭百八十歲太公
望百四十歲卜子夏百三歲

偶記卷之二

信州鄭仲夔龍如撰

南昌朱謀埠鬱儀閱

抵鵲盃

元自誠有抵鵲盃類珉而色淺黃夏月用浸桃李冰與果俱冰齒盛冬貯水則竟不凍又陳思王有鵲尾杓柄長而直置之酒樽凡王欲勸飲者呼之則尾指其人

四夷望里而拜

文徵明名重一時四夷貢道吳門者望其里而拜以不得見爲恨

岳武穆詩

岳武穆湖南寺詩潭水寒生月松風夜帶秋聲
韻清越不類宋人

俞西安

俞琬綸爲西安令憐才好士若將不及所知逢

人稱說一時名賢遜揚略過惟一士尤爲督學
所攔困踣日甚僉屢欲薦之未得促會以疾免
官去深以爲歉至疾篤猶惓惓致書當事以其
人相屬僉字君宣長洲人

種紙

懷素工草書貧無紙乃多種蕉以供揮灑人問
之曰吾種紙耳

少有神解

偶記

卷之二

二

何景明少有神解年十三領鄉薦十七成進士
李夢陽名重海內何晚出一日而與之齊

芙蓉枝穿玉玦

錢信鎮湖州後園芙蓉枝上穿一黃玉玦枝梢
交襖不知從何穿入信乃截榦取玦以獻

祝仙

近往來荆楚間有祝海慧者人皆稱爲祝仙所
至輒居夏屋女侍數十人獨往獨來莫能測也

善導氣術能爲人延年祛疾兼救人患難鄉士大夫多師事之孝感令余君患首疾不能生子往游其門教以導氣四十九日則疾愈且宜子矣令從之未及期首疾頓瘳適御史行部至郡令往迎焉以故卒無子又嘗問已仕至何官語以州牧令不懌祝曰數載州牧亦不惡恐弗暨也後果驗別時授令以丹三粒其內子得活者再有鄉人疾篤者與其一亦藉無恙孝感有太

學生爲族所誣當事者欲固寘之辟其人至破
產弗能解詣祝求脫祝書符令佩其人如言往
當事者不覺內解得賴以免又有何某者聾耳
瞶目足且跛亦授導氣術倏焉能暗視遠聽馮
虛而躍矣後不知所終

菊有實

甘菊花謂之日精一名更生一名女華其葉可
羹其花可釀其囊可枕其實可仙菊亦有實但

難得耳

韓奕深隱

韓奕深隱自高郡守姚善聞而造焉不得前乃欲因王賓致之亦竟不能一日善與賓至其所奕走蘆中避去

出奢求亡屨

楚昭王旣出奢亡屨使人求以百金左右曰敝可舍王曰敝政不可舍

允鋸柄

禮若允鋸之柄允訓舉禮有所斷割猶舉鋸之柄以斷物也

譚至丙夜

余與文孫偕往往譚至丙夜僮僕竊聽以爲不知何語之縷縷也

雨金

夏禹時天雨金三日周成王時咸陽雨金今咸

陽有雨金原

黃中李

西王母居龍月城城中產黃中李開花則三影
結實則九影花實上皆有黃中二字王母惜之
過於蟠桃

臂多修毫

常開平遇春驍猛絕世狀類獼猴指臂多修毫
初附劉聚嘗晝寢夢一羽士語曰起起此處非

偶記

卷之二

五

爾所宜托也爾主至矣既寤適
太祖至遂傾
心焉

暗麝

蘇子瞻名茉莉爲暗麝曾端伯謂之雅友又南
粵閩中有黃紅二種茉莉

文昌橋

撫州文昌橋先是木梁有一人生命與造橋時
自正同踰數十年橋焚其人亦死今改爲石梁

史冊從來未有

壬午諸忠臣或慷慨成仁或從容赴義總之視死如歸雖厲威之下不能禁也真史冊從來所未有哉後死者以忠於所事故亦忠之屬從亡行遜別有深意如衣葛備塞馬先生老補鍋雲門僧諸君子彼其心心故主有惻乎其爲衷者蓋當時忠必蒙禍至使人不敢顯言其忠以故多湮沒靡得而詳茲錄其可得知者烈烈而死

若魏國公徐輝祖越雋侯俞通淵樂城侯李堅
駙馬都尉胡觀翰林文學博士方孝孺侍講樓
璉脩撰主叔英編脩王艮中書舍人郭節何申
吏部侍郎毛大亨或云毛太戶部侍郎卓敬盧
翹郭任子經俱主事巨敬禮部尚書陳廸侍中
黃觀侍郎黃魁兵部尚書鐵鉉齊太侍郎陳植
徐瑩主事樊士信刑部尚書暴昭侯太侍郎胡
子昭張昂工部侍郎董倫給事中陳繼之韓永

龔太黃鉞都御史茅大芳陳性善副都御史
子寧御史大夫景清左僉都周璿司中巡撫黃
清監察御史曾鳳韶魏冕高翔董鏞鄒朴王度
井霖王彬謝昇鄭公智王玘左拾遺戴德彝大
理寺少卿胡閏寺丞鄒瑾彭與民王高劉瑞太
常寺卿黃子澄少卿盧原質廖昇宗人府經歷
宋徵布政司叅政鄭居貞理問徐讓按察司使
王良李文敏副使程本立張琳僉事湯宗林嘉

猷燕長史葛誠伴讀余逢辰谷長史劉璟晉長
史龍鐔遼長史程通寧長史石撰衡紀善周是
修知府姚善葉惠仲楊任陳彥回黃希范知州
蔡運吏目鄭華知縣顏伯瑋子有爲鄭恕張彥
方向朴縣丞衛健主簿唐子清典史黃謙教授
王省陳思賢叅軍斷事高巍都督廖鏞楊松都
指揮使謝貴彭二馬宣朱鑑瞿能宋忠余瑱彭
聚滕聚孫太莊得陳質楚智皂旗張指揮使崇

剛宋瑄張倫盧振趙諒張壽鎮撫曾璿楊本失
爵號梁良用牛景先高不危馬坤鄒文壽張烏
仔杜奇陳子方黃埤程亨失姓名尚書徐松江
同知東湖樵樂清樵夫舉人劉政秀才伍性原
陳應宗林珏鄒君默曾廷瑞呂賢成卒儲福皂
隸茅印仔凡百四十有一人後死者若開國公
常昇歷城侯盛庸駙馬都尉梅殷耿璿吏部尚
書張統工部尚書嚴震直翰林侍講王達國子

博士黃彥清都督耿獻劉貞宰忠徐凱平安指
揮使王資宋謙千戶倪諒鎮撫周拱元太監吳
誠凡十有八人懷來之戰將較被俘不屈而死
者百餘人從亡編脩程濟凡一人贊畫叅軍斷
事錢芹布衣王賓韓奕凡三人行遯御史葉希
賢中書舍人梁良玉宋和僉事胡子義失爵號
梁田玉梁中節何洲郭良失姓名衣葛傭塞馬
先生老補鍋雪菴和尚雲門僧耶溪樵玉華山

樵等凡四十餘人棄官北平屬州縣朱寧等凡
二百九十有一人辭職進士陳周教授林大同
訓導劉亨秀才高賢寧成卒龔翊凡五人謫成
徐魏公子欽知府石允常孫鎮凡三人蓋諸處
臣猶不止若而人而大畧可知者如此

鏡影

宋璟微時於日中覽鏡鏡影忽成相字

金陵銅陵

時賢共會滕王閣一客問費文孫貴郡有鉛山
更有玉山鉛與玉政何以別費未卽荅時曾端
甫在坐應聲曰天下有金陵亦有銅陵請問金
與銅之所以分遂共大笑而止

况伯律

况鍾爲蘇州守歲滿當遷去民叩闕乞留者八
萬餘人鍾字伯律江西靖安人起家小吏

太康

夏書稱太康逸豫滅德黎民咸貳乃畋遊有洛
十旬弗反窮國君羿因民弗忍距于河咸貳者
貳不君之太康也弗忍者羿此時便圖篡夏而
祇德之君敬承之胤明德猶在人不可忘也蔡
傳弗忍訓民不堪命于文理似強

賴韓少安

韓襄毅蕤字永熙吳人年未三十擢僉都御史
巡撫江西恩威大著土木之變北虜猖獗西南

夷繼叛諸省無不被兵惟江西賴韓得少安

洛如花

吳興山中有一樹類竹有實似莢狀名洛如花
郡有文士則生

無友不如有仇

余友張爾緼嘗言人而無友不如有仇仇亦足
祛人眉宇間窳惰氣可謂名言爾緼名燁芳山
陰人早卒

婁逞

南齊女子婁逞東陽人變服爲丈夫仕至楊州從事

疫無鬼

楊仲芳年弱冠讀書僧舍諸僧病疫同舍生俱亡去公獨曰吾去是吾死僧矣爲之視爨事問醫調藥僧以次愈後其兄亦病疫報至公奔歸扶侍日夜不解衣兄尋愈時人異之爲語曰疫

無鬼以爲不信視楊子

吹笛雨止

周穆王時天下連雨三月穆王乃吹笛其雨遂止

齒本

齒本曰矧大笑則矧見故禮曰父母有疾笑不至矧

太甲罄

玉山縣東北三十里有太甲齋居民盡陶姓有神廟中供太甲像左右曰陶氏夫人像居人享祀唯謹相傳商王太甲迎婚至此其說不經而特異筆之以爲好奇者譚資也

誕十四月

王伯安守仁母鄭夫人誕十四月而生生時其祖母夢神人袞冕乘五色雲下抱一兒相授驚寤而聞啼聲遂名之曰雲五歲尚不能言一日

出從羣兒戲有僧見而撫之曰異哉兒奈何名
泄之耶忽不見因爲更今名遂能言

偶記卷之三

信州鄭仲夔龍如撰

南昌朱謀埴鬱儀閑

譚笑却虜

宗子相叅政閩中身在圍城譚笑却虜條上禦
倭策執政至讀不能置

半隱園

建安王半隱園有古池深丈許中有石砌一方

傳記

堆若古墓然內時作金鼓聲

長恩

司書神曰長恩除夕呼其名祭之鼠不敢嚙蠹魚不生

讀書匡山

費文孫弱冠讀書匡山欲構一草堂其上以無資不果

陸羽著書甚多

陸羽本唐文人著書甚多曰君臣契三卷源解三十卷江表四姓譜十卷南北人物志十卷吳興歷官記三卷湖州刺史記一卷占夢三卷乃世傳者惟茶經

韓幹

韓幹凡作馬必考時日面方位然後定形骨毛色故得造神

古度林於

庾信詩含風搖古度防露動林於古度樹名見
吳都賦林於竹名戴慶豫竹譜云越女試劒竹
也

文信國

文信國天祥旣赴義是日大風揚沙天地盡晦
咫尺不辨自此連日陰晦宮中皆秉燭羣臣入
朝亦設炬前導元世祖悔之贈公太保中書平
章事廬陵郡公隨設壇致祭丞相孛羅行初奠

禮忽狂飈旋地起吹沙滾石不能啓目俄捲其
神主於空中隱隱雷鳴如聞怨聲天色愈暗乃
改前宋少保右丞相信國公天復開霽此事甚
奇而正史及公集中皆不載何耶

渡江佩禹字

渡江河者朱書禹字佩之免風濤

崑崙玉盞

宇文卓方執崑崙玉盞聽左丞檀超高譚不覺

墜地

王瑞安

王長公祚昌字億伯余師遐仲先生兄也爲瑞安令以德讓化民民不忍欺每聽斷得情必問其人心輸否如其人尚自展辯卽虚心再訊更以理論之復問如前如是者再三其人願自受板杖至三五板多不過十板民有受其杖者若犯嚴刑公居官僅四月而卒百姓哀號如失考

妣爲之罷市者七日後某官來視篆事使隸卒
往窮鄉勾攝被訟者其人初不知令公已故也
訊之得其實卽放聲大哭舉家聞之皆哭此卒
亦不覺失聲公亡不二旬遂祀名宦百姓又特
爲祠祀之如事生云

臥疾猶時作詩

費文孫高爽邁出英氣難干臥疾猶時作詩臨
岐家人問以後事荅云大丈夫豈畏一死者無

得瑣瑣

多情花鳥

王賓遁跡西山姚廣孝以舊好訪之謂曰寂寂空山何堪久住荅曰多情花鳥不肯放人

蒲坂

夷齊不死周地而死蒲坂蒲坂堯舜揖遜之區

栢倒栽

萬載縣慈化寺爲普菴道場後園中有側栢以

三人圍之高二三丈頂上枝鬚如根相傳以爲
普菴手植乃倒栽之其木未枯枝堅如鐵石風
霜不能摧折真奇樹也

生而能言

軒轅氏生而能言

盜亦有公是非

趙鎡亂河南行剽至鈞州以馬太宰文升家在
舍弗攻破泌陽焦大學士芳已匿去燬其家取

芳衣冠縛鞶若人狀而屠裂之目恨不爲天下
殺此賊人謂盜亦有公是非云

落英

楚辭餐秋菊之落英落字訓始

芝麻通鑑

吳俗好用芝麻點茶市中有以零碎通鑑裏者
一人頻買得積紙數十好以其中語掉舌人間
始末輒窮云我家芝麻通鑑止此耳

終身不踐土

鄭思肖宋末人工寫蘭又嘗製祭鬼之法宋室
既亡終身不踐土每爲人寫蘭亦不著土人問
之曰宋豈尚有土耶便歔歔而泣余在費茂才
家見其遺筆疎枝簡葉宛爾芳馨後有跋語數
則余不記記其一爲韓奕云

雅諢

海虞孫艾字世節爲人磊落每譚論風生使人

顧解嘗偕友人過某縣治見有帶枷於庭者友人因論次謂此公持法甚平恕孫笑曰旣庶矣又何加焉于時以爲雅謔

玉脂燈臺

正德八年琉球進玉脂燈臺每油一兩許可照十夜光燄鑒人毛髮風雨所不能侵劉瑾嘗竊以自照燈忽發花作人面耳目口鼻俱有瑾蓄逆謀以爲已祥暗祝曰我大事成當封若花忽

凋萎仍作咤噫聲越數尺飛潑瑾衣袍成油暈
數處氣腥如血滿室暗晦瑾大怒拔金如意碎
之逆謀因之遲回竟以誅滅

易腸鼠

唐房升天雞犬竝去惟有鼠不將去鼠悔一月
三出腸

桓

桓詩保有厥士于以四方保訓愛天生賢才原

以爲國設有賢不用用賢不盡與無賢同武王
列爵分土使諸士得盡其用其愛惜人才不啻
曲至故能定厥家而於昭于天也近因後世烏
盡弓藏之說都作保全功臣解不知武王伐商
非富天下當時敦商之旅不期而集何嫌何疑
而待保全耶

蓄墨數百觔

司馬溫公無所嗜好獨蓄墨數百觔曰欲子孫

思吾用此何爲也

胡光祿

胡光祿顯忠來遊南州值久旱禱雨人情皇皇
胡對人云明日日中當雨次日天氣清明咸以
爲不驗至期忽陰雲四起果大雨又劉太史曰
寧權吏部遽日起行鼓吹聲過胡聞之愕然曰
劉公其不祿乎人問故荅曰此日與時不利出
行小或罷官大至隕命未幾報至太史果卒于

途

武侯父子

諸葛武侯父子王右軍大令皆長于畫世所不知

驚湖松

鉛山驚湖寺唐義公道場也有羅漢松一株爲其手植義公亡松遂枯萎後養上人來住此松復就生今亭亭干雲矣

碧塋

凡死忠而不得屍者得血以塋曰碧塋

如客得歸

宋訥爲助教橫經發難擊郤廓塞學者如客得歸

一生宦途掌兵

江陰徐公孟初以小吏授兵部主事進員外郎
又進侍郎正統初與總兵官同征麓川以功進

本部尚書一生宦途皆掌兵事亦奇也公爲吏
時人奉以財必問所從致言出諸已者十取一
二或云假貸反以資之愈盡心其事後雖躋階
巍列而清儉自奉儼若寒士

廣道

閩人相傳武夷山有廣道者爲吾邑人山中人
稱爲廣道其舉動多異衆同輩每惡之一日忽
向衆言曰我將去時山中方構新菴衆曰今方

興作女何言去道領之及菴成衆嘲之曰女向
言當去今不去耶道曰女欲我去我明日便當
去問去以何時曰日中衆皆哂之至期各以事
下山且授鑰令守菴道乃寄鑰山下居人謂曰
我今度關去不歸矣衆來煩以此鑰相授居人
如其言衆還菴鎖鑰如故開視之則此道已端
坐逝其中矣其生像至今尚存云

明詩評

王元美明詩評獨北地信陽濟南稱君餘人槩
以官稱咸有微辭

偶記卷之四

信州鄭仲夔龍如撰

南昌朱謀埜鬱儀閱

周翁

周翁崑山人有隱德生宋淳祐四年甲辰歷元
及明凡三朝洪武十三年庚申始卒年一百八
十七歲

鄧文潔

鄧文潔以讚有山水之癖自云每遇崇山峻嶺
不登絕處不休不臨懸不壯爾時神情獨得仙
仙欲飛公仕至少宰臨終家無餘貲諸緡紳出
金爲賻始得殮

太白書迹

本事詩言李太白書迹適利鳳跋龍拏今世傳
有二帖

楊君非所及

鄭考功曉素負鑒裁見楊仲芳深愛重之嘆曰
楊君故非所及

如意盤

馬懷真有異術一日召十數客面前一方臺臺
上有小銅盤一黑匙一乃以匙次第置客口中
皆覺有酒盞許入喉又以盤向人傾之滿口作
羊味次魚次雞一坐皆同人私視其底有文曰
天公匙如意盤

書倉

曹曾積石爲倉以藏書名曹氏書倉

文星典吏

杜子美十餘歲夢人令采文于康水覺而問人
此水在二十里外乃往求之見幾冠童子告曰
汝本文星典吏天使汝下謫爲唐世文星海九
雲諸已降可于豆壠下取甫依其言果得一石
金字曰詩王本在陳芳國九夜捫之麟篆熟聲

振扶桑享天福後因佩入蔥市歸而飛火滿室
有聲曰邂逅穢吾令汝文而不貴

顛主事

楊儀部循吉字君謙吳人狂誕傲物每讀書有
所得則呌跳不休人因稱顛主事顧華玉謂人
過吳不可不一造君謙亦未易造君謙

文選槩入詩賦

吳中一士人凡鄙而好矜其識時張伯起纂文

選注成刻之其人誤爲伯起著作也詰曰子書
名文選何以槩入詩賦張道然曰此無與我事
盍問梁昭明其人便問昭明何處曰渠梁時人
今不在矣其人猶德色曰若在我當笑之張曰
渠讀書多縱在亦那得女笑地

里中祥瑞

王選仲師與瑞安君祚昌文學君祺久共以有
道著聲熏唱箎和郡人士望之爲楷模時目爲

里中祥瑞

葡萄說

岳季方正善畫葡萄嘗爲葡萄說云葡萄本中國名果神農九種功力爲最世謂得之大宛歸種漢宮皆未之考意者初不經見而博望貳師之所得又將特異遂附會之與

賭書

齊太祖嘗與王僧虔賭書謂曰我書何如卿虔

曰臣正書第一草書第三陛下草書第二正書
第三臣無第二陛下無第一帝曰卿可謂口多
微辭

名聞夷夏

馬文升字負圖鈞州人名聞夷夏退然若不勝
公生而有異兆貌瓌奇多贅力嘗與羣兒戲角
之無不仆者七歲讀書知大義踰冠成進士時
主冢宰直異其材選授監察御史出按山西再

按湖廣所至有神君稱

秦結了

秦結了能言鳥一日有夷人買去鳥曰我漢禽
也不入夷地遂死

秦渠

螢火幽州謂之秦渠

彩雲見南中

漢武帝朝彩雲見南中雲南之名始此

簡遠有準

余德甫曰德雅譚笑然簡遠有準宗子相叅閩
藩卒于官無子余時亦官閩中使其子棐經而
受弔

楊廷和

少師楊廷和十二中鄉試

忠賢奇秘錄

松陽人王詔游治平寺觀轉藏聞藏上嚄嚄有

如役小兒東海黃公見而慕之謂其神靈在刀
遂竊佩之行遇虎于路出刀以相格弗勝爲虎
所食

鳴過鐘

養公性至孝父母忌日必拜禮懺悔一日母忌
偶忘未及懺禮明晨憶起因號泣跪向佛前命
諸弟子杖之諸弟子不肯杖強之再三不得乃
自罰資鑄鐘上書已不孝鑄此鐘以贖罪因目

其鐘曰鳴過鐘

奇禽就掌取食

李白與東巖子隱徂徠山巢居數年不跡城市
養奇禽十許每呼皆就掌取食了無驚猜

吉祥指揮

于大司馬謙以枉論死臨刑陰霾翳天行路嗟
嘆曹吉祥麾下指揮以一觴酹其地而慟吉
祥恚朴之明日復酹慟如故謙嘗輕騎自河內

歷太行有盜伏窺謙厲聲叱之皆大驚散走曰
不知爲我公幸赦罪

荔枝

閩地荔枝以興化楓亭驛爲最長樂次之

酒沃瓜

遼東一處有瓜沃則以酒代水實成剖之若中
止一子而長數寸者食一顆可作十日糧國人
珍之名獨子青

鄂家鳴金

湖廣鄂家爲岳武穆後至今遺有宋勅命及武穆征討鳴金一面每值方隅有警則此金不敲預鳴

掘土得蘭亭

彭次嘉營寒松館命僕於梧桐樹下掘土爲臺至三四尺許有青石一塊石上得蘭亭刻板字劃如新爲余友彭雲徵所得

夏太常

夏太常子陽在京師中夜獨居忽有婦人持短
七直前夏驚問婦熟睨之曰非是非是因趨出
公隨踪之不見

慧明

釋慧明閩人來止九仙巖者數年終日靜坐客
至酬對客去靜坐如初所悟皆儒理

雙手寫二牘

黃華雙手能寫二牘或楷或草揮毫不輟各自有致

廣陵困道

劉司馬文卿廣昌人以高才屢蹶顧益自刻勵攻苦不休自經史以及外家方書無不究厥指歸所撰著甚富一日夢神人謂曰子數當奇窮死今上帝憐子好學特改昇富貴矣已復出廣陵困道四字相示且云好記之踰年公舉鄉薦

第一人遂聯第以金華司李累官至兵部郎然
公自往返京師輒避廣陵地不復取道會以使
事至某郡偶經一寺前視其額有廣陵字公憶
夢中語竟鬱悒成疾卒于官舍其著述今多散
佚云

第四泉

郡北門外之茶山寺泉水清美異于他水昔陸
鴻漸來游飲此水愛之品爲天下第四泉遂憩

其地種茶茶山之命名因此今泉名茶山泉或稱羽泉亦曰乳泉亦曰第四泉

樹中鼓樂細人

河南鞏縣有木匠偶持斧憩道旁樹下忽聞鼓樂聲不知其自諦聽之乃出樹中遂將斧擊樹數下其內曰好不好不好斫進來矣匠益重加斧見有細人長三四寸各執樂具自樹中出地上猶作樂數疊始仆地

不能蓄書

徐禎卿天性穎異家貧至不能蓄一書而無所不通蓋借閱也

仰廷尉

仰廷尉瞻長洲人幼師夏時及貴每經其里必式過其門則下而趨當王振擅權其門如市唯瞻與薛瑄顧惟敬不肯往

良知

一士從王文成學初聞良知不解卒然起問曰
良知爲黑爲白一坐失笑其人慚而色赧王徐
曰良知非白非黑其色正赤耳

偶記卷之四